

МЕСЯЦА НОЕМВРИЯ В 13-Й ДЕНЬ.

**ИЖЕ ВО СВЯТЫХ ОТЦА НАШЕГО ИОАННА, АРХИЕПИСКОПА КОНСТАНТИНАГРАДА,
ЗЛАТОУСТАГО**

НА МАЛОЙ ВЕЧЕРНИ

На Господи, воззвах: Стихиры на 4, глас 1.

Подобен: Небесных чинов:

Крестителя подражал еси тезоименного добре воздержанием, отче, * и Илию великаго постом и чистотою: * ревностно уязвлен обоих, Златоусте, * на царское величество смельствуеши, * яко пастырь Церкви Христовы.

Божественным вдохновением Слова * протек, по писанному, всю землю, * вещание догматов твоих, отче, просвети мир: * отверзл еси нам покаяния вход, * нищих попечением возбуждая Христово Евангелие.

Чистый души твоя и нескверный свет * солнечныя лучи осиявает миру догматов благочестия, * отче мудре Иоанне Златоусте, * и мглу отгонит, * и просвещает вселенную ко благочестию.

Слава, глас 4:

Был еси, Златоусте, Богодохновенный орган, * чрез егоже нам Дух Святый провозгласи: * благознаменитым бо гласом * протече концы вещание учений твоих, * и, подражатель быв апостолов, преподобне, * лик постиже оный, егоже вожделем еси. * Молися Господу, всеблаженне, * умирить мир и спасти души наша.

И ныне, Богородичен:

Избави ны от нужд наших, Мати Христа Бога, * рождающая всех Творца, * да вси зовем Ти: * радуйся, едина предстательство душ наших.

На стиховне стихиры, глас 2.

Подобен: Доме Евфрафов:

Труба златовидная, * светло вопиющи Божия величия, * показался еси, Иоанне, мира в концев.

Стих: Уста моя возглаголют премудрость, * и поучение сердца моего разум.

Закон, якоже Моисей, приял еси от Господа, Златоусте, * мир умудря и просвещая * Божественными твоими учениями.

Стих: Священницы Твои облекутся в правду, * и преподобнии Твои возрадуются.

Проповедник яко истинно Божественнаго царствия * был еси, Златослове, вопия: * покайтесь, погружая отчаяние.

Слава, глас и подобен тойже:

Троицы Честныя во единоначалие научил еси веровати, * Отца, Слова, Духа, * Златоусте, отче наш.

И ныне, Богородичен:

Дево, из Тебе рождашагося Бога Слова * моли, Богородице, с Златословным Иоанном, * еже спасти души наша.

Таже, **Н**ыне отпущаеши: **Т**рисвятое. **П**о **О**тче наш:

Тропарь святителя, глас 8:

Уст твоих, якоже светлость огня возсиявши, благодать * вселенную просвети: * не сребролюбия мирови сокровища сниска, * высоту нам смиренномудрия показа, * но, твоими словесы наказуя, отче Иоанне Златоусте, * моли Слова Христа Бога спастися душам нашим.

Слава, и ныне, **Б**огородичен:

Иже нас ради Рождейся от Девы, * и распятие претерпев, Благий, * испровергий смертию смерть, и Воскресение явлей, яко Бог, * не презри, яже создал еси рукою Твоею, * яви человеколюбие Твое, Милостиве, * прими Рождшую Тя Богородицу, молящуюся за ны, * и спаси, Спасе наш, люди отчаянные.

НА ВЕЛИЦЕЙ ВЕЧЕРНИ

Стихологисуем Блажен муж: 1-й антифон.

На Господи, возвах: стихиры на 8, глас 4.

Подобен: Яко добля:

Златокованную трубу, Богодохновенный орган, * догматов пучину неисчерпаемую, * Церкви утверждение, * ум Небесный, премудрости глубину, * чашу всезлатую, * изливающую реки учений медоточных и напаяющую тварь, * песенно воспоем. [Дважды.]

Звезду незаходимую, * зарями просвещающую учений всю подсолнечную, * покаяния проповедника, * губу всезлатую, * мокроту лютую неведения вземлющую * и орошающую истаявшая сердца грехми, * Иоанна достойно Златословеснаго почтим.

Земный Ангел и Небесный человек, * ластовица благоглаголивая и многогласная, * добродетелей сокровище, * камень неразседный, верных воображение, * мучеником подобен, * равностоятель святых Ангел, * апостолов единоправен, * в песнях да возвеличится Златоуст.

Глас 2:

Дом духовный одеянии, яко камении, согражден * и мир покрываяй, * премудрый Златоуст. [Дважды.]

Дом духовен благодати всей * слова премудрости явися, внутрь имый, * Златоусте блаженне.

Глас 5:

Дом священных добродетелей священный * себе совершил еси, * в тебе бо жилище, * яко во святем храме и честнейшем, отче, * положи, премудро окормив, * и чувства телесная, * яко в неокрадоме сокровищи, * соблюл еси помышления страстных смущений, * отнюдуже Боговиднейши, преблаженне, быв, * Церкви предстательством украшен, * Христа моли, * подающаго миру велию милость.

Слава, глас 6:

Преподобне, треблаженне, святейший отче, * пастырю добрый и началопастыря Христа учениче, * положивый душу за овцы: * сам и ныне, всеблагохвальне Иоанне Златоусте, * проси молитвами твоими * даровати нам велию милость.

И ныне, Богородичен: Кто Тебе не ублажит:

Вход, прокимен дне и чтения.

Притчей чтение (главы 10, 3, 8):

Память праведнаго с похвалами, и благословение Господне на главе его. Блажен человек, иже обрете премудрость, и смертен, иже уведет разум. Лучше бо сию куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней и лета живота в деснице ея, в шуйце же ея богатство и слава. От уст ея исходит правда, закон же и милость на языке носит. Послушайте убо мене, о чада! честная бо реку: и блажен человек, иже пути мои сохранит: исходи бо мои – исходи живота, и уготовляется хотение от Господа. Сего ради молю вас и предлагаю мой глас сыновом человеческим. Яко аз, премудрость, устрой совет, и разум, и смысл аз призвах. Мой совет и утверждение, мой разум, моя же крепость. Аз мене любящия люблю,

ищущии же мене обрящут благодать. Разумейте убо, незлобивии, коварство, ненаказаннии же, прилагайте сердца. Послушайте мене и паки, честная бо реку, и отверзу от устен правая, яко истине поучится гортань мой, мерзски же предо мною устны лживыя. С правдою вси глаголы уст моих: ничтоже в них стропотно, ниже развращенно. Вся права суть разумевающим и проста обретающим разум. Научаю бо вас истине, да будет о Господе надежда ваша, и исполнитесь Духа.

Премудрости Соломоновы чтение (главы 10, 6, 8, 9):

Уста праведнаго капают премудрость, устне же мужей мудрых ведут благодать. Уста мудрых поучатся премудрости, правда же избавляет их от смерти. Скончавшуся мужу праведну, не погибнет надежда. Сын бо праведен раждается в живот и во благих своих плод правды обьимет. Свет праведным всегда, и от Господа обрящут благодать и славу, язык мудрых добрая свесть, и в сердце их почиет мудрость. Любит Господь преподобная сердца, приятни же Ему вси непорочнии в пути. Мудрость Господня просвещает лице разумнаго: постигает бо желающия ю, прежде даже разумети ю, и удобь узрится от любящих ю. Утреневавый к ней не утрудится, и бдяи ея ради вскоре без печали будет. Яко достойных ея сама обходит, ищущи, и во стезях ея является им благоприемне. Мудрости никогдаже одолеет злоба. Сих ради и рачитель бых доброты ея, и возлюбих ю, и поисках от юности моя. И взысках невесту привести себе, яко всех Владыка возлюби ю. Таибница³ бо есть Божия хитрости и обретательница дел Его. Труды ея суть добродетели: целомудрию же и разуму та учит, правде и мужеству, ихже потребнее ничтоже есть в житии человеком. Аще же и многоискусства желает кто, весть древняя и быти хотящая рассмотрит: свесть извития словес и разрешения гаданий, знамения, и чудеса проразумет, и сбытия времен и лет, и всем советник есть благ. Яко безсмертие есть в ней и благославие во общении словес ея. Сего ради беседовах ко Господу, и помолихся Ему, и рех от всего сердца моего: Боже отцев и Господи милости, сотворивый вся Словом Твоим и мудростию Твоею устроиый человека, да владеет бывшими от Тебе тварьми и да управляет мир в преподобии и правде, даждь ми Твоих Престолов приседящую премудрость и не отлучи мене от отрок Твоих, яко аз раб Твой и сын рабыни Твоея. Посли ю с Небес от святого жилища Твоего и от Престола славы Твоея, да, сущи со мною, научит мя, что благоугодно есть пред Тобою, и наставит мя в разум, и сохранит мя в славе своей. Помышления бо смертных вся боязлива и погрешительна умышления их.

Премудрости Соломоновы чтение (главы 4, 6, 7, 2):

Похваляему праведнику возвеселятся людие: безсмертие бо есть память его, яко от Господа познавается и от человеков, и угодна Господу душа его. Возлюбите убо, о мужие, мудрость и поживете, восхощите ея и наказани будете, Начало бо ея – любви и соблюдение закона. Почтите премудрость, да во веки царствуете. Возвещу вам и не скрюю от вас таин Божиих, яко Той мудрости Наставник есть, и мудрых Исправитель, и всякому смыслу и делу Хитрец. И всем смыслом научит мудрость: есть бо в ней Дух Разумен и Свят, и сияние Света Присносущнаго, и образ благости Божия; тая други Божия и пророки устрояет. Благолепнейши же есть солнца и паче всякаго сотворения звезд, свету сосуждаема, обретається первейши. Тая, угождающая ей, от болезни избави и настави на стези правыя. Даде им разум имети свят, и сохрани от ловящих, и подвиг крепок подаде им. Да разумеют вси, яко сильнейши всего есть благочестие. И никогдаже преможет злоба мудрости, ниже преидет, злыя

обличаючи, суд. Рекоша же в себе, помысливше неправедно: насильствуем праведнаго и не пощадим преподобства его, ни усраимся седин старости многолетны. Будет бо нам крепость закон, и уловим праведнаго, яко неугоден нам есть: и противится делом нашим, и поносит нам отпадение закона, и обличает нам согрешения наказания нашего. Возвещает нам разум имети Божий и отрока Господня себе именует. Бысть нам на обличение помышлений наших, и тяжек нам есть, и видимъ: яко неподобно иным житие его, и изменены стези его. В поругание вменихомся ему: и удаляется от путей наших, яко от нечистот, и блажит последняя праведных. Увидим убо, аще словеса его истинна суть, искусим, яже сбываются ему. Руганием и мукою истяжем его, да разумеем кротость его, и искусим беззлобство его: смертию безобразною осудим его, будет бо посещение от словес его. Сия помыслиша и прельстишася: ослепи бо я злоба их. И не разумеша таин Божиих, и не рассудиша, яко Ты еси Бог Един, живота имеяй и смерти власть, и спасаай во время скорби, и избавляй от всякаго зла. Щедр и милостив, и давай преподобным Своим благодать, и Своею мышцею гордым противляйся.

На литии стихира храма и святого самогласны, глас 1. Анатолиево:

Светильниче Иоанне, уста златосиянная, * удобрение Богодеянных добродетелей, * обиталище писаний тайноначальных: * ты пречистое, Всесвятаго Духа нетленное сокровище был еси, * отнюдуже возвеселил еси всю Церковь * спасительным твоим словом сущим, * дерзновение убо обрет к Богу, * в наслаждении Горняго наследия * молися о нас, отче святейший.

Излияся благодать во устнах твоих, * преподобне отче Иоанне Златоусте, * сего ради помаза тя Бог архиерея людем Своим, * паствити паству Его в преподобии и правде. * Темже, препоясан оружием Сильнаго, * пресекал еси языковредия ересей, * и ныне не престай моляся * умирити мир и спасти души наша.

Глас 2. Студитово:

Тя, великаго архиерея и пастыря, * незлобива и преподобна, * покаяния проповедника, * златословесная уста благодати, * восхваляюще любовию, молимся: * преподаждь нам молитвы твоя, отче, * во спасение душ наших.

Георгия Никомидийскаго:

Златыми словесы твоими, * Церковь, яко утварию златою, украсившись, * Иоанне Златоусте, * невестнически радующийся, вопиет тебе: * насытихся от твоих златоточных вод, * украсившись златотканными и медозлатыми питии; * от деяния бо в видение возвождуся * кротких ради твоих поучений * и со Христом, умным Женихом, соединяюся, царствующи с Ним. * Тем и мы, совокупльшеся в память твою, зовем: * не престай моляся за ны ко Господу, * еже спасти души наша.

Приял еси, иерарше, Горнейшую философию * и вне мира был еси, * живя вышше видимых, * и зеркало нескверное Божие Божественно показался еси, * и сый, присно соединен Светом, * свет принимал еси, * и яснейший блаженный получил еси конец. * Молися, Златоусте, о душах наших.

Глас 4:

Глаголы златозарнейшими * землю яве напоил еси, * златоточиву имея душу же и тело, всеблаженне, * вся позлатив словесы твоими, * златоделателю догматов твоих, * и, книги написав златописанныя, * возлетел еси на Небеса. * Тем вопием ти: * златоточиве и Златоусте, * Христа Бога моли спасти души наша.

Слава, глас тойже. Германово:

Подобаше Царствующему градов * Иоанна имети архиерея, * якоже некую утварь царскую * и златокованную трубу, * вся оглашающую концы спасительными догматы * и вся совоздвижущую к ревности пеней Боголепных. * К немуже возопиим: * златослове и Златоусте, * Христа Бога моли спасти души наша.

И ныне, Богородичен:

Тя стену стяжахом, Богородице Пречистая, * и благоутишное пристанище, и утверждение, * темже молим, иже в житии обуреваемии, * управи и спаси ны.

На стиховне стихиры, глас 5.

Подобен: Радуйся:

Радуйся, златозарный и красный * Церкви Богодохновенный органе; * языке, человеколюбно покаяния * нам различные образы подписующий; * уме златозрачный; * ластовице златоустая; * голубице же, псаломски междорамиями златосияющая * добродетелей на злаце; * струя златовиднейшая, * проливающая воды; * уста Божественная * и Божественного человеколюбия поручительная, * Христа моли низпослати душам нашим велию милость.

Стих: Уста моя возглаголют премудрость, * и поучение сердца моего разум.

Радуйся, сирот отец, * обидимых быстрая помощь, * убогим подаяние, алчущим пища, * грешащих исправление, * душ благоугоднейший врачу и честнейший, * Богословия высокое извество, * сказание писаний духовных, * закон действеннейший, * правило правейшее, * видения и деяния премудросте крайнейшая, * Христа низпослати душам нашим моли велию милость.

Стих: Уста праведнаго поучатся премудрости, * и язык его возглаголет суд.

Радуйся, Церковь вопиет ти, * жениху своему, о Златоусте! * Просиявый во всем мире паче луч солнечных * добродетельми и словесы бисерными, * паче мудрых премудрейший * и риторов превысочайший, * истинных догмат поборниче, * лжи обличителю, покаяния учителю. * Радуйся, тишайшая знания пучино, * иже, по Павлу великому, уста и ум наследовав Христов. * Егоже моли душам нашим дати велию милость.

Слава, глас 6:

Труба златогласная показался еси, * златоглаголиве Златоусте, * златодействуя сердца верных * златотрудными твоими учении, * пророчески бо изыде вещание исправлений твоих, преподобне отче, * и мира всего концы просветил еси.

И ныне: Творец и Избавитель мой:

**На благословении хлебов тропарь святого дважды и Богородице Дево,
радуйся: единожды.**

Тропарь святителя, глас 8:

Уст твоих, якоже светлость огня возсиявши, благодать * вселенную просвети: * не сребролюбия мирови сокровища сниска, * высоту нам смиренномудрия показа, * но, твоими словесы наказуя, отче Иоанне Златоусте, * моли Слова Христа Бога спастися душам нашим.

А идеже всенощное бдение не бывает, по тропаре: слава, и ныне, Богородичен:

Иже нас ради Рождейся от Девы, * и распятие претерпев, Благий, * испровергий
смертию смерть, и Воскресение явлей, яко Бог, * не презри, яже создал еси рукою
Твоею, * яви человеколюбие Твое, Милостиве, * прими Рождшую Тя Богородицу,
молящуюся за ны, * и спаси, Спасе наш, люди отчаянныя.

И отпуст.

На УТРЕНИ

На Бог Господь: Тропарь святителя, глас 8:

Уст твоих, якоже светлость огня возсиявши, благодать * вселенную просвети: * не сребролюбия миру сокровища сниска, * высоту нам смиренномудрия показа, * но, твоими словеса наказуя, отче Иоанне Златоусте, * моли Слова Христа Бога спастися душам нашим. [Дважды].

Слава, и ныне, Богородичен:

Иже нас ради Рождейся от Девы, * и распятие претерпев, Благий, * испровергий смертию смерть, и Воскресение явлей, яко Бог, * не презри, яже создал еси рукою Твоею, * яви человеколюбие Твое, Милостиве, * приими Рождшую Тя Богородицу, молящуюся за ны, * и спаси, Спасе наш, люди отчаянные.

По 1-ом стихословии седален, глас 1.

Подобен: Лик Ангельский:

Златообразная звезда, земным возсиял еси, Златоусте, светло, * Иоанне всеблаженне, * просвещая концы зарями словес твоих. * Тем днесь всесвятую твою память празднующе, * грехов всех просим оставления.

Слава, и ныне, Богородичен:

Безвестная Чистая Богородице Дево, * едина верных Предстательнице и Покрове, * бед и скорбей и лютых обстояний вся избави * на Тя упование, Отроковице, имущия * и души наша спаси Божественными молитвами Твоими.

По 2-ом стихословии седален, глас 5.

Подобен: Собезначальное Слово:

Цветника словес Богодохновенных писаний, * наставляющего нас к покаянию, * многая искушения претерпевша, * Златоустаго, вернии, яко научившися от него, почтим по долгу: * молися бо Господу спастися душам нашим.

Слава, и ныне, Богородичен:

Ужасно чудо зачатия * и несказанен образ рождества в Тебе познася, Приснодево Чистая, * ужасает мой ум и удивляет помышление, * слава Твоя, Богородице, всем простресея ко спасению душ наших.

По полиелеи седален, глас 8.

Подобен: Премудрости:

Сокровище явился еси духовное Божественными твоими словеса, * яко воистинну мира, Златоусте, просияв концем, * богатство спасительное всем подал еси, * наставляя, блаженне, люди к покаянию. * Тем и течение совершив жития, * Престолу предстоиши Вышняго, приснопамятне Иоанне Златоусте, * моли Христа Бога грехов оставление даровати * празднующим любовию святую память твою.

Слава, и ныне, Богородичен:

Небесную дверь и кивот, * пресвятую гору, светлый облак воспоим, * неопалимую купину, словесный рай, * Евы воззвание, вселенная вся великое сокровище, * яко спасение в Ней соделася мира и оставление древних согрешений. * Сего ради вопием Ей: * молися Сыну Твоему прегрешений оставление даровати * благочестно поклоняющимся всевятому Рождеству Твоему.

Степенна, 1-й антифон 4-го гласа.

Прокимен, глас 4: Уста моя возглаголют премудрость, и поучение сердца моего разум.

Стих: Услышите сия, вси языцы, внушите вси живущии по вселенней.

Всякое дыхание:

Евангелие от Иоанна, зачало 35, от полу.

Рече Господь ко пришедшим к Нему иудеем: аминь, аминь глаголю вам, не входяй дверьми во двор овчий, но прелазя инуде, той тать есть и разбойник. А входяй дверьми пастырь есть овцам. Сему дверник отверзает, и овцы глас его слышат, и своя овцы глашает по имени, и изгонит их. И егда своя овцы ижденет, пред ними ходит, и овцы по нем идут, яко ведут глас его. По чуждем же не идут, но бежат от него, яко не знают чуждаго гласа. Сию притчу рече им Иисус, они же не разумеша, что бяше, яже глаголаше им. Рече же паки им Иисус: аминь, аминь глаголю вам, яко Аз есмь дверь овцам. Вси, елико их прииде прежде Мене, татие суть и разбойницы, но не послушаша их овцы. Аз есмь дверь, Мною аще кто внидет, спасется, и внидет и изыдет, и пажить обрящет.

По 50-м псалме стихира самогласна, глас 6:

Излияся благодать во устнах твоих, преподобне отче, * и был еси пастырь Христовы Церкви, * уча словесныя овцы * веровати в Троицу Единосущную * во едином Божестве.

Канон Пресвятыя Богородицы со ирмосом на 6. Глас 8.

Песнь 1

Ирмос: Воду прошед, яко сушу, * и египетскаго зла избежав, * израильтянин вопияше: * Избавителю и Богу нашему поим.

Многими содержимь напастьми, к Тебе прибегаю, спасения иский: о Мати Слова и Дево! от тяжких и лютых мя спаси.

Страстей мя смущают прилози многого уныния исполнити мою душу: умири, Отроковице, тишиною Сына и Бога Твоего, Всенепорочная.

Спаса рождашую, Тя и Бога молю, Дево, избавитися ми лютых: к Тебе бо ныне прибегая, простираю и душу, и помышление.

Недугующа телом и душею, посещения Божественнаго и промышления от Тебе сподоби, едина Богомати, яко благая, Благаго же Родительнице.

Канон святого на 8, егоже краегранесие: Духа пою тя, златое усто. Глас 8.

Песнь 1.

Ирмос: Колесницегонителя фараоня погрузи * чудотворяй иногда * Моисейский жезл, крестообразно поразив * и разделив море, * Израиля же беглеца, пешеходца, спасе, * песнь Богови воспевающа.

Покаяния быв теплейший проповедник, Златоусте, покаятися мне, отче, Богу молися от всего сердца моего и древних прегрешений исцелити язвы твоим страдательством²⁴ умоли.

Всю зарю Святого Духа, отче, приим, всесветел явился еси столп, предводителен Церкви, преподобне, светел же облак, всеблаженне, осеняющ православных соборы.

От Христа рукоположен учитель, Божественная учения златовидным языком, мыслию же Богомудрою богато ты источил еси: Божия бо река, вод исполнен Духа, явился еси, Богоявленне Златоусте.

Богородичен: Преукрашена различием благодати, Богорадованная, Отчее Слово, плоть бывшее за благоутробие многое паче ума и словесе, Благословенная, родила еси, пребывши Дева нескверная.

Катавасия: Отверзу уста моя:

Песнь 3

Ирмос: Небеснаго круга Верхотворче, Господи, * и Церкви Зиждителю, * Ты мене утверди в любви Твоей, * желаний краю, верных утверждение, * Едине Человеколюбче.

Предстательство и покров жизни моя полагаю Тя, Богородительнице Дево, Ты мя окорми ко пристанищу Твоему, благих виновна, верных утверждение, едина Всепетая.

Молю, Дево, душевное смущение и печали моей бурю разорити: Ты бо, Богоневестная, начальника тишины, Христа, родила еси, едина Пречистая.

Благодетеля рождши добрых виновнаго, благодеяния богатство всем источи: вся бо можеша, яко сильнаго в крепости Христа рождши, Богоблаженная.

Лютыми недуги и болезненными страстьми истязаему, Дево, Ты ми помози: исцелений бо неоскудное Тя знаю сокровище, Пренепорочная, неизживаемое.

Ин

Ирмос: Утверждаей в начале Небеса разумом * и землю на водах основавый, * на камени мя, Христе, заповедей Твоих утверди, * яко несть свят, паче Тебе, едине Человеколюбче.

Умом Ты Христовым обогащяся, твоим чистым житием человеком спасения был еси споспешник и повествователь, действитель, Златоусте, учительства точка спасительная, Богодохновенне.

От невещественных сокровищ Духа ты обогатився, от источников спасения почерп еси приснотекущий источник учений и напоил еси все Церкве, преподобне отче, лице.

Оляденевшая душевныя, Златоусте, нивы, премудрым земледелием словес изчистил еси, мудре, и плодоносны показал еси, Небесными тучами сия напаяя, Богоприятне.

Богородичен: Порока в Тебе и скверны несть отнюд, Дево, обитель же паче явилася еси Небесных благостей, в Тебе бо вселися добродетелей вся святыня, Всенепорочная.

Седален, глас 8.

Подобен: Премудрости:

Неизреченныя мудрости Боговидно почерп еси богатство разума, * всем сокровиществовал еси Православия воды, * верных убо сердца Божественне веселящая, * неверных же мнения достойно погружающая: * тем отобоюду благочестия потоми показался еси непобедный Троицы поборник, Иоанне Златоусте. * Моли Христа Бога грехов оставление даровати * празднующим любовию святую память твою.

Слава, подобен тойже:

Сущую свыше мудрость познав * и благодать словес от Бога всем просиял еси, яко злато в горниле, * и Святую Троицу, Единицу, проповедал еси, * сребролюбную леть устрелив словесы твоими. * Темже и ревностию царицу обличив, * Ариево посрамил еси иноплеменное кичение, Иоанне Златоусте, * моли Христа Бога грехов оставление даровати * празднующим любовию святую память твою.

И ныне, Богородичен:

Пламень геенский и сторение, * плач, иже в нем и рыдание, * зело окаянное разлучение и горчайшее, святых наследия * и собрания радостнаго, помышляющи, содрогнися, душе моя, и возстени^{цъ}, * и писания тминных^{цъ} долгов твоих истребити потщися умиления слезами, * Споспешницу непостыдную имущи, Чистую Богоматерь: * Тоя бо ради прегрешений дается оставление * Сию Богородицу православно славящим.

Песнь 4

Ирмос: Услышах, Господи, * смотрения Твоего таинство, * разумех дела Твоя * и прославих Твое Божество.

Страстей моих смущение, Кормчию рождающая Господа, и бурю утиши моих прегрешений, Богоневестная.

Милосердия Твоего бездну призывающую подаждь ми, яже Благосердаго рождающая и Спаса всех поющих Тя.

Наслаждающуюся, Пречистая, Твоих дарований, благодарственное воспеваем пение, ведуще Тя, Богоматерь.

На одре болезни моя и немощи низлежащу ми, яко благолюбива, помози, Богородице, едина Приснодево.

Надежду, и утверждение, и спасения стену недвижиму имуще Тя, Всепетая, неудобства всякаго избавляемся.

Ин

Ирмос: Ты моя крепость, Господи, * Ты моя и сила, * Ты мой Бог, Ты мое радование, * не оставль недра Отча, * и нашу нищету посетив. * Тем с пророком Аввакумом зову Ти: * силе Твоей слава, Человеколюбче.

Инаго нам апостолов единоплеменнаго, иже промышлением всех промышляя, яко Благ, даде Христос тя, Небеснаго тайноводства проповедника и Божественнаго сказателя таин Горних, Иоанне всеблаженне, Златоусте.

Златозарнаго и златословеснаго, почтим Златоустаго Иоанна, вся позлатившаго златовидными сиянии учения и мир языком просветивша, злата светлейшим и света полнейшим, источающим благодать Божественную.

Весь был еси Божие жилище, весь явился еси орган Духа, возглашающ всякия добродетели Богодохновенную песнь, и спасения вину, и доброту являя Небеснаго Царствия, Иоанне всеблаженне Златоусте.

Ты Божие благоутробие проповедал еси, покаяния образы излагая, и злых отбежания изящнейше поучая, преблаженне и всесовершеннейше, и о делех изрядных поучения источая, всечестне отче Златоусте.

Богородичен: По Бозе предстательницу Тя стяжахом, Ты бо Божия Мати была еси Творца и Содетеля, и наш зрак приемшаго, Всенепорочная, и сей спасаго от тли и смерти и славою Божественною прославившаго.

Песнь 5

Ирмос: Просвети нас повелении Твоими, Господи, * и мышцею Твоею высокою, * Твой мир подаждь нам; * Человеколюбче.

Исполни, Чистая, веселия сердце мое, Твою нетленную дающи радость, веселия рождающая Виновнаго.

Избави нас от бед, Богородице Чистая, вечное рождаши избавление и мир, всяк ум преимуществ.

Разрешити мглу прегрешений моих, Богоневесто, просвещением Твоея светлости, Свет рождающая Божественный и Превечный.

Исцели, Чистая, души моей немощие, посещения Твоего сподобльшая, и здравие молитвами Твоими подаждь ми.

Ин

Ирмос: Вскую мя отринул еси * от лица Твоего, Свете Незаходимый, * и покрыла мя есть чуждая тьма, окаяннаго; * но обрати мя и к свету заповедей Твоих * пути моя направи, молюся.

Церковнаго светильника вси ты веми световиднейшаго и душам спасительнаго, восхищающаго сии из гортани смертоносныя и к жизни путеводяща вечней, отче приснопеваемый.

Разрушаеши ополчения еретическующих, треблаженне, оградився благочестия оружии и мужеством души, священнейше, собираеши же, радуяся пресветло, православных лики союзом Духа.

Исполнены, якоже фиалы, Божественных аромат ланиты твоя и вселенную умными благовонии веселят мироварным тайноводством разумений и добротою словес твоих, всеумудре.

Богородичен: Яко Бога заченши, Содетеля же, и Зиждителя, и Господа, роди Тя вси человечестии, Чистая, ублажают, и Бестелесных разумная чиноначалия яко Матерь Божию Тя славят.

Песнь 6

Ирмос: Молитву пролию ко Господу * и Тому возведу печали моя, * яко зол душа моя исполнися, * и живот мой аду приближися, * и молюся, яко Иона: * от тли, Боже, возведи мя.

Смерти и тли яко спасл еси, Сам Ся издав смерти, тлением и смертию мое естество ято бывшее, Дево, моли Господа и Сына Твоего врагов злодействия мя избавити.

Предстательницу Тя живота веми, и хранительницу тверду, Дево, и напастей решающую молвы, и наложи бесов отгоняющую, и молюся всегда от тли страстей моих избавити мя.

Яко стену, прибежища стяжахом, и душ всесовершенное спасение, и пространство в скорбех, Отроковице, и просвещением Твоим присно радуемся, о Владычице, и ныне нас от страстей и бед спаси.

На одре ныне немощствуй лежу, и несть исцеления плоти моей. Но Бога, и Спаса миру, и Избавителя недугов рождающая, Тебе молюся, Благой, от тли недуг возстави мя.

Ин

Ирмос: **Очисти** мя Спасе, * многа бо беззакония моя, * и из глубины зол возведи, молюся: * к Тебе бо возопих, и услыши мя, * Боже спасения моего.

Мудростию духовною мир весь обогатил еси, словесе раздаватель быв богатый: богата бо свыше, иерарше, благодать излилася твоим устам.

Во всю, яко молния, землю изыде вещание твое, и сила же твоих глагол, Златоусте, яко труба велегласная, вселенная вся огласи концы.

Свыше во истканную ризу одеаяся, всеблаженне, добродетелей и словес красотою обложився, истины явился еси славное утверждение.

Богородичен: **В**седержительною силою носяй всяческая, в немощную плоть из Тебе одеаяся, Дево Пренепорочная, на благодение человеков Человеколюбец.

Кондак, глас 6.

Подобен: **Е**же о нас исполнив:

От Небес приял еси Божественную благодать * и твоими устнами вся учиши * поклоняться в Троице единому Богу, * Иоанне Златоусте, всеблаженне преподобне, * достойно хвалим тя: * еси бо наставник, яко Божественная являя.

Икос: **В**сех Творцу преклоняю колена, превечному Слову руки простираю, слова ища дарование, да воспую преподобнаго, егоже Сам возвеличи, глаголет бо пророком Живый во веки: прославлю верою славящия Мя. Иже убо в древних Самуила возвысивый, прослави ныне иерарха: талант бо, емуже вверися, добре купльствовав, Царю принесе, тем и превозвышши его Пресущественный. Сего благодати прошу недостойный аз слово прияти ми, да возмогу благочестно воспети того: концев бо той есть наставник, яко Божественная являя.

Песнь 7

Ирмос: **От** Иудеи дошедше, отроцы * в Вавилоне иногда * верою Тройческою пламень пещный попраша, поюще: * отцев Боже, благословен еси.

Наше спасение, якоже восхотел еси, Спасе, устроити, во утробу Девы вселился еси, Юже миру Предстательницу показал еси: отец наших Боже, благословен еси.

Волителя милости, Егоже родила еси, Мати Чистая, умоли избавитися от прегрешений и душевных скверн верою зовущим: отец наших Боже, благословен еси.

Сокровище спасения, и источник нетления Тя, Рождающую, и столп утверждения, и дверь покаяния зовущим показал еси: отец наших Боже, благословен еси.

Телесныя слабости и душевныя недуги, Богородительнице, любовию приступающих к крову Твоему, Дево, исцелити сподоби, Спаса Христа нам рождающая.

Ин

Ирмос: **Божия** низхождения * огонь устыдися в Вавилоне иногда, * сего ради отроцы в пещи радованною ногою, * яко во цветнице, ликующе, пояху: * благословен еси, Боже отец наших.

Благости бездну и благоутробия навек Божия, поручник явился еси спасения кающимся тепле и вседушно Господу зовущим: благословен Бог отец наших.

Управляеши, Златоусте, учении твоими всякую мысль, и душевныя врачуеши немощи, яко сострадательнейший, и благотекущим споеши, веселяся: благословен Бог отец наших.

Возвысился еси, быв избран, преподобен, незлобив, священник Высочайшаго, правдою одеян светло и веселием, зовый, всебогате: благословен Бог отец наших.

Богородичен: **З**ачала еси, Пречистая, Суцгаго над всеми Бога и Господа, благоволившаго спасти человеческий род от тления и смерти. Егоже, достойно поюще, зовем: благословен Бог отец наших.

Песнь 8

Ирмос: **Ц**аря Небеснаго, * Егоже поют вси Ангельстии, * хвалите и превозносите во вся веки.

Помощи иже от Тебе требующия не презри, Дево, поющия и превозносящия Тя во веки.

Неможение души моя исцеляеши и телесныя болезни, Дево, да Тя прославлю, Чистая, во веки.

Исцелений богатство изливаеши верно поющим Тя, Дево, и превозносящим неизреченное Твое Рождество.

Напастей Ты прилоги отгоняеши и страстей находы, Дево. Темже Тя поем во вся веки.

Ин

Ирмос: **С**едмерицею пещь * халдейский мучитель * Богочестивым неистовно разжже, * силою же лучшею спасены, сия виде, * Творцу и Избавителю вопияше: * отроцы, благословите, * священницы, воспойте, * людие, превозносите во вся веки.

Иже разумно словесем твоим беседующе, Златоусте, Богословия честному учимся, и всеплодствуем благих полезное, и злобы отбегаем вреда: общий бо строитель спасения был еси, вопия: превозносите Христа во веки.

За ны моли Владыку, Златоусте, сострадательнейшее дерзновение имея и милостивною и человеколюбною твоею, отче, любовию: ты бо ко Спасу предлагаем, вернии, ходатая же, и предстателя, и теплейша молитвенника, Богомудре иерарше, всеблаженне Иоанне.

Юношское противление, и непреклонное мудрование, и царствующих неправду обличил еси, тепле предстательствуя обидимыя, преподобне; и сирот, и вдов, и нищих отец был еси любовным предложением, превозносите, вопия, Христа во веки.

Богородичен: **Т**елесными образованияи, и различными гаданияи, и символическими, и знаменательными предьявленными, Твое провозвестиша Богоглаголивии рождество, преестественное и чудное, Дево; тем Тя, веселящися, благочестно воспеваем, Христа превозносяще во вся веки.

Песнь 9

Ирмос: **В**оистинну Богородицу * Тя исповедуем, * спасеннии Тобою, Дево Чистая, * с Безплотными лики Тя величающе.

Тока слез моих не отвратися, яже от всякаго лица всяку слезу отъемшаго, Дево, Христа рождшая.

Радости мое сердце исполни, Дево, яже радости приемшая исполнение, греховную печаль потребляющи.

Света твоего зарями просвети, Дево, мрак неведения отгонящи благоверно Богородицу Тя исповедающих.

На месте озлобления немощи смирившагося, Дево, исцели, из нездравия во здравие претворяющи.

Ин

Ирмос: Ужасеся о сем Небо, * и земли удивишася концы, * яко Бог явися человеком плотски, * и чрево Твое бысть пространнейшее Небес: * тем Тя, Богородицу, * Ангелов и человек чиновачалия величают.

Истинно наслаждаяся, отче, жизни, о нейже подвизался еси, елико мощно, на земли житием преизяществовав Ангельским и Христов стяжав язык и уста тихая: спаситися, Богоглаголиве, моли тя верою изящне блажащим.

Словеса твоя, треблаженне, словеса жизни, жизнь ходатайствующая неконечную: ты бо источника текуща показа Христос и реку, проливающую Божественных потоки учений, сладости истинно поток, оставления же струю и покаяния светла проповедника.

Ходатай явился еси, священноначальниче, Бога и человеков пресветлый, ты бо светильник явился еси благочестия Богосветлый и Божественнаго знания и милостыни наказатель: тем тя, златослове, сердечною любовию ныне достойно величаем.

Богородичен: Чистая препрославленная Мати Божия, поющая Тя любовию спасай, искушений молву разрешающи милостивно. Яко бо Бога рождши, вся, елико хоцещи, совершаеши, успеваеши невозбранно и можеши, Дево. Тем Тя вси величаем.

Светилен:

Подобен: Духом во святилищи:

Златозарными словесы твоими Христова Церковь светлеется ясно, * о Златоусте отче! * Души же веселятся верных, почитающих всесвятую твою память, * ты бо всем показался еси покаяния наставник и вождь спасения.

Слава, иный.

Подобен: Жены, услышите:

Великогласнейшаго покаяния проповедника, * сокровище убогих, * уста Церкви золотая и благоглаголивая, писаний явление, * Иоанна всемудраго да восхвалим вси, * яко от того утвердившися.

И ныне, Богородичен:

Дево Всенепорочная, * Госпоже моя и Владычице, * Твоего Сына умоли с славным Златоустом * напастей избавитися всяческих поющим Тя * и вечных получитьи благ, Всесвятая: * можеши бо, елика хоцещи.

На хвалитех стихиры на 4, глас 4

Подобен: Дал еси знамение:

Сосуд честнейший Божественнаго Духа был еси * и пастырь священнейший, * Ангел на земли, столп церковный и догматов степень, * грешных поручник, кающихся Божественное утешение, * нищих же промысленник и сирот утешение, * Иоанне Златоусте, * молитвенниче о душах наших.

Солнце многосветлое, * вселенную словесы твоими озаряя, * был еси звезда светлейшая, * свеща светящая зари, * иже в мори мира всегда обуреваемая * привлекаая ко пристанищу тишайшему * спасения благодатию, златослове Златоусте, * молитвенниче о душах наших.

Ангел земный и Небесный человек, * славий добродетельный, * река, исполняема словесных вод, * облак тучи разумныя, * всем нам богато капающий, * спасения учитель и покаяния споспешник, * Иоанне Златоусте, воистинну был еси.

Неправедно от паствы твоя изгнан, отче преподобне, * приобщился еси скорбем и горьким заточением, * в нихже удостоился еси блаженныя кончины, * аки доблестенный страдалец, * победив многокозненнаго, * и победы диадимию ты Христос венча, * Иоанне Златоусте, * молитвенниче о душах наших.

Слава, глас 8. Анатолиево:

Златыми словесы и Боговещанными учении * украсив Божию Церковь, * богатство духовное сокровищствовал еси в ней, * твоя Богопреданная словеса. * Тем венец из нетленных цветов сплетши песньми, * священней твоей приносит памяти, * всезлатый душею с языком, Иоанне Богомудре, * но, яко имея дерзновение, преподобне, * молися о душах наших.

И ныне:

Владычице, прими молитву раб Твоих, * и избави нас * от всякия нужды и печали.

Славословие великое. И отпуст.

НА ЛИТУРГИИ

Блаженны от канона, песнь 3-я и 6-я.

Умом Ты Христовым обогащя, твоим чистым житием человеком спасения был еси споспешник и повествователь, действитель, Златоусте, учителяства точа спасительная, Богодохновенне.

От невещественных сокровищ Духа ты обогатився, от источников спасения почерпал еси приснотекущий источник учений и напоил еси все Церкве, преподобне отче, лице.

Оляденевшия душевныя, Златоусте, нивы, премудрым земледелием словес изчистил еси, мудре, и плодоносны показал еси, Небесными тучами сия напаяя, Богоприятне.

Мудростию духовною мир весь обогатил еси, словесе раздаватель быв богатый: богата бо свыше, иерарше, благодать излилася твоим устам.

Во всю, яко молния, землю изыде вещание твое, и сила же твоих глагол, Златоусте, яко труба велегласная, вселенныя вся огласи концы.

Слава: **С**выше во истканную ризу одеявся, всеблаженне, добродетелей и словес красотою обложився, истины явился еси славное утверждение.

И ныне: Богородичен: **В**седержительною силою носяй всяческая, в немощную плоть из Тебе одеявся, Дево Пренепорочная, на благодеяние человеков Человеколюбец.

Тропарь святителя, глас 8:

Уст твоих, якоже светлость огня возсиявши, благодать * вселенную просвети: * не сребролюбия миру сокровища сниска, * высоту нам смиренномудрия показа, * но, твоими словесы наказуя, отче Иоанне Златоусте, * моли Слова Христа Бога спастися душам нашим.

Кондак святителя, глас 6.

От Небес приял еси Божественную благодать * и твоими устнами вся учиши * поклонятися в Троице единому Богу, * Иоанне Златоусте, всеблаженне преподобне, * достойно хвалим тя: * еси бо наставник, яко Божественная являя.

Прокимен, глас 1: Уста моя возглаголют премудрость, и поучение сердца моего разум.

Стих: Услышите сия, вси языцы, внушите вси живущии по вселенней.

Апостол ко Евреем, зачало 318.

Братие, таков нам подобаше Архиерей, преподобен, незлобив, безсквернен, отлучен от грешник и вышше Небес быв. Иже не имать по вся дни нужды, якоже первосвященницы, прежде о своих гресех жертвы приносити, потом же о людских: сие бо сотвори единою, Себе принес. Закон бо человеки поставляет первосвященники, имущия немощь, слово же клятвенное, еже по законе, Сына во веки совершенна. Глава же о глаголемых: такова имамы Первосвященника, иже седе одесную Престола Величества на Небесех, святым служитель и скинии истинней, юже водрузи Господь, а не человек.

Аллилуия, глас 2: Уста праведнаго поучатся премудрости:

Евангелие от Иоанна, зачало 36.

Рече Господь ко пришедшим к Нему иудеем: Аз есмь дверь, Мною аще кто внидет, спасется, и внидет, и изыдет, и пажить обрящет. Тать не приходит, разве да украдет, и убьет, и погубит, Аз приидох, да живот имут и лишше имут. Аз есмь пастырь добрый, пастырь добрый душу свою полагает за овцы. А наемник, иже несть пастырь, емуже не суть овцы своя, видит волка грядуща и оставляет овцы, и бегает, и волк расхитит их, и распудит овцы. А наемник бежит, яко наемник есть и нерадит о овцах. Аз есмь пастырь добрый, и знаю Моя, и знают Мя Моя. Якоже знает Мя Отец, и Аз знаю Отца, и душу Мою полагаю за овцы. И ины овцы имам, яже не суть от двора сего, и тыя Ми подобает привести, и глас Мой услышат, и будет едино стадо, и един Пастырь.

Причастен: В память вечную будет праведник:

На трапезе бывает братии великое утешение.